




25 keluarga terima bantuan bulanan My Kasih



● Kanak-kanak dari keluarga yang terpilih menerima bantuan bulanan merakam kenangan bersama replika cek di Pasaraya Giant Kepong.

SEGAMBUT – Seramai 25 keluarga miskin di Segambut menerima bantuan bulanan bernilai RM80 di bawah program Yayasan My Kasih.

Pengarah Yayasan My Kasih, Ho Kay Tat berkata, ke semua keluarga terbabit akan menerima bantuan tersebut selama setahun dan sumbangan sebanyak RM25,000 telah diperuntukkan oleh Pemaju Perumahan Sunrise Berhad.

“Kerja kebijakan yang dilaksanakan Yayasan My Kasih adalah selaras seruan kerajaan dalam memberi per-

hatian kepada mereka yang memerlukan,” katanya.

Beliau berkata demikian pada majlis penyampaian sumbangan kepada keluarga terbabit di Pasaraya Giant Kepong, di sini.

Kay Tat berkata, pemilihan keluarga penerima sumbangan dibuat secara adil dan telus melalui proses pemilihan manakala untuk pengagihan bantuan diberikan menerusi ibu.

“Mereka tidak menerima wang bantuan tersebut secara tunai sebaliknya wakil boleh membeli belah barang keperluan harian di Pasaraya Giant dengan

menggunakan My Kad di mana setiap dua minggu keluarga terbabit akan menerima sumbangan berjumlah RM40,” katanya.

Sementara itu Penolong Pengarah Urusan Penjenamaan dan Pembangunan Komuniti Sunrise Berhad, Anne Tong berkata, sumbangan yang diberikan adalah tanggungjawab sosial syarikat kepada masyarakat.

“Kita harap dengan bantuan ini, ia mampu memberikan semangat kepada keluarga terbabit meningkatkan taraf hidup mereka,” katanya.